

• VERHOOGDE PRODUKTIWITEIT, ARMOEDEVERLIGTING

BILLIKE BEGROTING, ONDANKS UITDAGINGS

Munisipaliteit Overstrand se begrotingsproses vir 2010/11 staan einde se kant toe met die oorweging van die publiek en belanghebbers se kommentaar op die konsepbedryf- en kapitaalbegroting, die hersiene Geïntegreerde Ontwikkelingsplan en die hersiene Ontwikkelingsplan vir Waterdienste wat na verwagting op Woensdag, 26 Mei 2010 tydens die Raadsvergadering voorgelê sal word.

Volgens die konsepdokumente sal die 2010/11-begroting vir bedryfsuitgawes met 23 persent tot R707 miljoen styg. Die voorgestelde styging in eiendomsbelasting op residensiële eiendomme is 8,39 persent en op sake-eiendomme 10 persent. Voorts gaan water- en afvalverwyderingstariewe met 8 persent styg; 'n nuwe tariefstruktuur vir riolering is voorgestel, bestaande uit 'n vaste maandelikse heffing van R70,00 en 'n gebruikskoste gegronde op die persentasie waterverbruik, en die verhoging in elektrisiteitstariewe sal tussen 22 en 24 persent wees.

Die kapitaalbegroting sal met 8 persent van die aangesuiwerde 2009/10-syfers na R145 miljoen groei. Die munisipaliteit is van plan om 'n lening van R100 miljoen oor drie jaar op te neem om in water- en rioleringsinfrastruktuur te belê, en 'n afgekampde heffing van R15 sal op rekeninge gehef word om dit terug te betaal.

Aanvanklike reaksie op die begrotingsvoorstelle blyk positief te wees, maar die Bulletin moes ter perse gaan voor die finale datum vir voorleggings op Vrydag, 30 April

2010. Desondanks, as die openbare debat wat op 1 April 2010 deur die gemeenskapsradiostasie, Whalecoast FM, aangebied is as maatstaf moet dien, lyk dit asof die voorgestelde begroting die publiek se goedkeuring wegdra.

Ten tye van die voorlegging van die begrotingsdokumente en tydens 'n vergadering van die Overstrand Munisipale Adviesforum op 9 April 2010 het Uitvoerende Burgemeester Theo Beylveldt die moeilike omstandighede verduidelik waaronder die begroting opgestel moes word. Veral die uitdaging van die styging in die prys van elektrisiteit wat nasionaal goedgekeur is en die steeds stygende brandstofpryse is as belangrike probleme uitgesonder waarmee geworstel moes word.

Verhoogde produktiwiteit is 'n belangrike manier om stygende koste die hoof te bied, en Munisipaliteit Overstrand het daarin geslaag om die salaris- en loonkomponent van die begroting tot slegs 27 persent te beperk wat aansienlik laer as die nasionale norm van 38 persent is. 'n Poging sal ook aangewend word om terug te sny op die vlak van oortydbetalings.

Spesiale aandag is aan die verknorsing van die armes gegee: Die inkomstedrempel om vir die deernistoelae te kwalifiseer, is nou vier maal die bedrag van 'n maatskaplike pensioen, en alle huishoudings in eiendomme wat as R50 000 en minder aangeslaan word, sal vrygestel wees van basiese gelde en sal slegs vir verbruik betaal. Die koste

TIPE UITGAWE	2009/10 HUIDIGE BEGROTING R'000	2009/10 VOORGE- STELDE BEGROTING R'000	% TOE- NAME / (AFNAME)	% VAN BEGRO- TING
Salarisse en Lone	159 417	189 711	19%	26,8%
Algemene Uitgawes	318 812	394 296	23,6%	55,8%
Herstel en Onderhoud	51 663	61 340	18,7%	8,7%
Kapitaalkoste	125 231	148 684	18,7%	21%
Min aanvullings	655 122 (80 502)	794 030 (86 942)	8%	
TOTALE				
Bedryfsuitgawebegroting	574 621	707 088	23%	

STYGINGS IN DIE 2010/11 BEDRYFSBEGROTING VERGELEK MET DIE AANGEPASTE 2009/10 BEDRYFSBEGROTING

hieraan verbonde, sal deur die Sentrale Regering se billikedeeltoekenning befonds word en nie deur belastingbetalers nie.

Ook op die sakelyst is die hersiening van die Geïntegreerde Ontwikkelingsplan (GOP), soos deur die Munisipale Stelselwet vereis. Vanjaar se dokument is meer omvattend as ooit aangesien dit ook die waterdienstebe-
stuursplan en die ruimtelike ontwikkelings-
raamwerk insluit. Die GOP dien as die muni-
sipaliteit se vernaamste strategiese beplan-
ningsinstrument en informeer besluitneming
en die bestuur van alle beplanning- en
ontwikkelingsaktiwiteite. Die publiek het tot 7
Mei 2010 om die hersiene GOP te bestudeer

en daarop kommentaar te lewer.

Die hersiene 2010/11-ontwikkelingsplan vir Waterdienste (WDOP) maak 'n integrale deel van die GOP uit. Dit is 'n belangrike werktuig wat Munisipaliteit Overstrand, as 'n Waterdienste-owerheid, help om 'n realistiese langtermyn-investeringsplan te ontwikkel wat die voorsiening van basiese waterdienste prioritiseer, ekonomiese ontwikkeling bevorder en oor die jare heen bekostigbaar en volhoubaar is. Die WDOP moet beplanning vir watervoorsiening met sanitasiebeplanning integreer en sluit 'n lys van infrastruktuurprojekte ter waarde van R213 miljoen in wat vir die volgende drie jaar beoog word.

RIOLERINGSTARIEWE GEHERSTRUKTUREER

Die nuwe tariefstelsel vir spoelriolering weerspieël tot 'n groot mate die Munisipaliteit Overstrand se strewende na billike en regverdigde tariewe vir sy inwoners.

In sy poging om bekostigbare dienste te lewer, hersien die Munisipaliteit Overstrand gereeld sy lys van kernfunksies en die diensleweringstelsels wat deur die publiek verwag word. Indien nodig, word alternatiewe wyses van dienslewering verder ondersoek.

Die nuwe tariefstruktuur vir spoelrioleringsdienste bestaan uit 'n vaste basiese heffing van R70,00 per maand en 'n verbruikskomponent wat aan die hand van waterverbruik bepaal sal word.

Volgens mnr Hanré Blignaut, adjunk-direkteur: water en vervoer, is dit nie net billik wat dienslewering betref nie maar gee dit ook uitvoering aan nuwe regulasies kragtens die Wet op Waterdienste wat volumetriese sanitasietariewe vereis. Boonop sal dit inwoners aanmoedig om water spaarsamig te gebruik.

Die vaste heffing word bepaal aan die hand van die vastekoste-komponente van die diens, naamlik salarisse en kapitaal. Almal moet dit betaal, uitgesonderd laekoste-huishoudings en wonings met wettige septiese tenks, wat 'n heffing van R47,37 per maand sal betaal.

Die volumetriese tarief beloop R7,50 per kiloliter, wat vir huishoudings op 70 persent van hul verbruik tot die maksimum van 35 kiloliter en vir ander gebruikers op 90 persent van hul

verbruik bereken sal word. Hierdie tarief dek die veranderlike kostes van die diens, soos die suiwering van die riool en die vervoerkoste.

Mense wat in die verlede tenkerdienste moes gebruik om rioolwater te verwyder, sal nie meer afsonderlik daarvoor hoef te betaal nie mits die diens binne werkure benut word. Gebruikers wat nie aan munisipale waterstelsels gekoppel is nie, sal wel vir die diens betaal.

Watertariewe styg gemiddeld met 8 persent, maar twee vlakke van tariewe vir wanneer waterbeperkings afgekondig word, is goedgekeur. Vlak 1 maak voorsiening vir 'n kostestyg van 30 persent en vlak 2 vir 60 persent. Nat industrieë word met 'n tweevlak-tariefstelsel tegemoetgekom en kleiner kommersiële en sportverbruikers met 'n drievlak-
skaal. Aansoek moet vir die toepassing van laasgenoemde tariewe gedoen word.

Die impak van Eskom se elektrisiteitsverhogings word deur die munisipaliteit se tweeledige tariefstelsel getemper. Die vaste heffing word met slegs 8 persent verhoog, wat tot gevolg gaan hê dat verbruikers slegs tussen 22 en 26 persent meer vir krag gaan betaal en nie die 29 persent wat die munisipaliteit meer moet opdok nie.

Vullisverwydering styg in die algemeen met 8 persent. 'n Nuwe tarief vir selfstorting by oorlaastasies word vir gebruikers ingestel wat nie vir die diens gehê word nie, soos bv plaasbewoners. Massahuurs kan voortaan by die munisipaliteit teen 'n dagtarief gehuur word.

OMVATTENDE PROSES VIR OPSTELGEVOLG

Om 'n begroting vir 'n munisipaliteit op te stel, is geen maklike taak nie. Om die waarheid te sê, dit is 'n omvattende proses bestaande uit velerlei strategiese en sakebeplannings-sies en verg die volle deelname van die publiek en ander belanghebbende.

Hierdie proses is neergelê in 'n gedetailleerde tydrooster wat reeds in Augustus 2009 deur die Raad goedgekeur is en waarin die baie sleutelmylpale wat bereik moet word, aangedui is.

Die proses het afgeskop met 'n strategiese hersiening van prioriteite by 'n werksessie wat deur raadslede en bestuur bygewoon is. Dit het in 'n rigtinggewende toespraak gekulmineer wat tydens 'n vergadering van die burgemeesterskomitee op 1 September 2009 deur die Uitvoerende Burgemeester, mnr

Theo Beyleveldt, gelewer is.

Sakebeplanning is aan die onderskeie departemente oorgelaat, welke departemente deur gereelde mededelings rakende strategiese aangeleenthede ingelig gehou en ook deur insette van die wykskomitees begelê is. Laasgenoemde het nuwe projekte geïdentifiseer of veranderings aan bestaande programme op die geïntegreerde ontwikkelingsplan voorgestel.

Prioriteite is by vergaderings van die burgemeestersoorsigpaneel deur die loop van die begrotingsiklus bepaal. Sessies is gedurende Desember 2009 en Maart 2010 met alle direkteure en bestuurders gehou.

Die finale stap voor die voorlegging van die konsepbegroting by die Raadsvergadering op 31 Maart 2010 was om tariewe en

gelde, begrotingsverwante beleid, die salarisstrategie en die finalisering van die bedryfsbegroting en projekte op die kapitaalbegroting in oënskou te neem.

Benewens die publiek se insette, sal beradingslagings met provinsiale amptenare van die departement van plaaslike regering later vandeemaand volg, en dit mag dalk steeds 'n impak op die finale begroting hê.

Ook van belang in die proses is die bewerkstelling van ooreenstemming tussen die begroting en die geïntegreerde ontwikkelingsplan ten einde die volhoubaarheid van dienslewering en die finansiële lewensvatbaarheid van die munisipaliteit te verseker. By goedkeuring sal 'n dienslewering- en begrotingimplementeringsplan (SDBIP) opgestel word om die uitvoering van die

begroting en GOP te fasiliteer.

Die Nasionale Tesourie het tot die proses bygedra deur inligting oor nasionale prioriteite, oorkoepelende inflasievoorspellings, befondsingskeuses en bestuursvraagstukke, voorwaardelike oordragte na munisipaliteite, regulasies vir munisipale begrotings en verslagdoening en ander riglyne te verskaf.

Nuwe formate vir munisipale begrotings, aansuiweringsbegrotings en in-jaar-verslagdoening is neergelê wat aanmerklike veranderings aan stelsels, prosedures en parameters noodsaak. Alhoewel die Nasionale Tesourie toegee dat dit tyd sal neem om volle nakoming te behaal, het Munisipaliteit Overstrand hom daarvoor beywer om die formate sover moontlik na te kom. Ondersoek na verbeterde stelsels word tans onderneem.

WAAR KOM DIE GELD VANDAAN

Die totale inkomstebegroting vir 2010/11 beloop R623 117 990, wat 'n 18,92 persent toename op die aangesuiwerde 2009/10-inkomstebegroting van R524 149 449 verteenwoordig.

Soos elders in die grafiek aangedui, is Overstrand se hoofbronne van inkomste:

eiendomsbelasting; elektrisiteitskoste; waterkoste; sanitasiekoste; afvalverwyderingskoste; koste vir ander dienste; regeringstoekennings; en rente.

Ten opsigte van eiendomsbelasting is 'n aantal vrystellings en kortings van toepassing:

- Die eerste R15 000 van die munisipale waardasie wat aan 'n eiendom toegewys is, word kragtens die Wet op Munisipale Eiendomsbelasting van eiendomsbelasting vrygestel.
- Die volgende R35 000 van die munisipale waardasie wat aan 'n eiendom toegewys is, word ooreenkomstig Overstrand se eiendomsbelastingbeleid van eiendomsbelasting vrygestel.
- 'n Verdere korting van 20 persent is van toepassing op eiendomsbelasting wat vir residensiële eiendom gehef word waar 'n residensiële voltooingsertifikaat uitgereik is.
- Voorwaardelike kortings vir pensioentekkers, gastehuse, B&O's en landbou-eiendomme asook vir residensiële en sake-ontwikkelings buite die tradisionele stedelike gebiede kan ook voor aangesoek gedoen word.

Met die verhoging van die prys van elektrisiteit wat buite die beheer van die munisipaliteit is en waar die munisipaliteit nie in staat is om hierdie verhogings te absorbeer nie, word slegs die regstreekse prysstygings vir verbruik na verbruikers deurgegee.

Die volhoubare voorsiening van drinkbare water word toenemend 'n groter uitdaging. Hierdie skaars kommoditeit moet optimaal bestuur word onderwyl prysstygings in die koste van chemikalieë en elektrisiteit om water te behandel, ook hul tol eis. Die bloktariefstelsel vir waterverbruik is ontwerp om water teen 'n bekostigbare tarief tot op 30kl per huishouding per maand te lewer. Straftariewe is vasgestel om uitermatige waterverbruik in te kort.

Die gelykmaking van rioleringstariewe vir alle eiendomme in stedelike gebiede sal oor 'n tydperk van twee jaar ingefaseer word, en 'n koste vir volumetriese gebruik is ingevoer.


Koste vir ander dienste sluit inkomste uit gelde vir bouplanne en voertuigregistrasie in.

Vanaf die sentrale regering het die munisi-

paliteit R52 miljoen as sy billike deel en in die vorm van toekennings vir finansiële bestuur, verbetering van munisipale stelsels, munisipale infrastruktuur, geïntegreerde nasionale elektrifisering en woonbuurtontwikkeling gekry.

Vanaf die Wes-Kaapse provinsie is toekennings van R32 miljoen vir behuising, biblioteekdienste, gemeenskapsontwikkelingswerkers, paaiesubsidies en die prysgeld vir die Skoonste Dorp gemaak.

Ander bydraes was afkomstig van die WNNR vir behuisingstechnologie wat in die Kleinmond-behuisingsprojek gebruik moet word, ABSA-bank vir die Gemeenskaplike Sportkompleks op Gansbaai en die Overberg-distriksmunisipaliteit vir die aanbring van aanwysings langs die walviskusroete. Voorts is bydraes van Cape Town Routes Unlimited, die WWF/Tafelbergfonds en die Umsombumwo-fonds ontvang.



DIE 2010/11 BEDRYFSINKOMSTEBEGROTING AAN DIE HAND VAN DIE VERNAAMSTE BRONNE VAN INKOMSTE

BEDRYFSUITGAWES WERK SÓ

Die 2010/11-begroting vir bedryfsbesteding beloop R707 088 390, wat 'n verhoging van 23 persent verteenwoordig vergeleke met die huidige gewysigde begroting van R574 620 637. In 2009/10 is die begroting vir bedryfsbesteding ook met 22 persent verhoog.

'n Opsomming van die begroting word in die tabel op die voorblad gegee.

SALARISSE EN LONE: Vanjaar se begroting bedra R189,7 persent, wat 26,8 persent van die begroting vir bedryfsbesteding uitmaak. Hierby ingesluit is die vergoeding van raadslede maar personeel wat aan agentskapprojekte soos die Werk-vir-Water-projek werk, is uitgesluit. Die diensstaat sal in die nuwe boekjaar teen 'n koste van R9,3 miljoen vergroot word om dienslewering te verbeter. Dit sluit ook die inkorporering van die personeel van die voormalige entiteit OLEDA by die munisipale diensstaat op 1 Julie 2010 in. Ooreenkomstig die driejaar-loonooreenkoms met nasionaal beding is, sal salarisse met 8,1 persent verhoog word.

DIVERSE UITGAWES EN HERSTEL EN INSTANDHOUDING: Alhoewel kostestygings vir die meeste items onder hierdie opskrif tot die algemene inflasiakoers beperk is, was daar 'n aantal versoeke vir verhoogde begrotings vanaf bestuurders ten einde dienslewering te verbeter. Voorts word Eskom se tariefaanpassing, die stygende

koste van chemikalieë vir watersuiweringswerke en die wisselvallige koste van brandstof ook hierby ingesluit. Die bydraes tot die sentrale verbeteringsdistrik, ook bekend as Hermanus Public Protection, en die Bestemmingbemarkingsorganisasie (R2,75 miljoen) vir die bedryf van toerisme-buro's, feeste en bemarkingsaktiwiteite sal ook hieruit kom. Die ontbinding van OLEDA sal tot 'n besparing van R900 000 aanleiding gee, alhoewel sy funksie om ekonomiese ontwikkeling te fasiliteer, voortgesit sal word.

Geen voorsiening is vir gebeurlikhede gemaak nie. Besparings wat gedurende die boekjaar geïdentifiseer word, sal aan 'n gebeurlikheid toegewys en tydens die aansuiweringsbegrotingsproses behartig word.

LAE-INKOMSTESUBSIDIE EN BEHOEF-TIGES: Die billikedeelbydrae wat vanaf die sentrale regering ontvang word, welke bydrae vanaf R14 miljoen na R20 miljoen verhoog is, maak voorsiening om die munisipaliteit se deernisbeleid ten volle te befonds. Die program sal uitgebrei word om huishoudings in te sluit waar die inkomste gelyk is aan of minder is as die bedrag van vier keer 'n maatskaplike staatspensioen en sal ook eienaarbesette eiendom met 'n belasbare waardasie van tot op R50 000 dek.

PROJEKTE VIR BASIESE DIENSTE: Pro-

jekte is in die kapitale en bedryfsbegroting ter voortsetting van die konsep van plaaslike arbeidsbevoordoring (LLP), veral ten opsigte van vloedwaterbestuur, padbou en skoonmaakdienste, geïdentifiseer. Hierdie projekte sal oral in die munisipale gebied onderneem word. LLP-projekte dra by tot plaaslike ekonomiese ontwikkeling en verseker dat 'n gedeelte van 'n begunstigde se inkomste gebruik word om sy of haar munisipale skuld te betaal.

BYDRAE TOT BEDRYFSKAPITAAL: Die doel hiermee is om voorsiening te maak vir die afskryf van oninbare skuld, en die bydrae behoort laer as die vorige begrotingsvlak te wees aangesien die volle implementering van die deernisbeleid en die verhoging van die plafon om as hulpbehoewend te kwalifiseer die vlak van oninbare skuld behoort te verlaag. Die aanstelling van skuldinvorderaars op kontrak sal hierdie skuld verder laat afneem.

KAPITALE KOSTE: Hierdie voorsiening hou verband met afbetalings op skuld en waardevermindering. Laasgenoemde het skerp vanaf R36 miljoen tot R120 miljoen gestyg as gevolg van die implementering van die Algemeen Aanvaarde Rekeningkundige Praktijk (GRAP) wat daartoe aanleiding gegee het dat die waarde van die munisipaliteit se bates vanaf R659 miljoen tot R5123 miljoen gestyg het.

AGTERSTANDE STEEDS INGEHAAL

Die 2010/11-begroting vir kapitale projekte is 'n voortsetting van die Munisipaliteit Overstrand se program van die afgelope drie jaar om die agterstande in grootmaatinfrastruktuur in te haal en sal waarskynlik nog vir die afsienbare tyd voortduur.

Sedert 2008/9 is groot hoeveelhede geld gebruik om nuwe infrastruktuur te skep en bestaande fasiliteite op te gradeer. Vir 2010/11 word 'n verder R146 miljoen voorsien, wat 'n toename van 8 persent op die aangepaste 2009/10-begroting van R135 miljoen verteenwoordig.

Uit munisipale bronne word R120 miljoen voorsien, terwyl R26 miljoen vanaf bevestigde eksterne bronne, soos regeringstoekennings, sal kom.

Die munisipaliteit beoog om 'n buitengewone lening van R95 miljoen oor die volgende drie jaar op te neem vir die opgradering van water- en rioolwerke, waarvan die terugbetaling as 'n infrastruktuurheffing op munisipale rekeninge verskans sal word. Dié heffing sal ongeveer R15 per maand per rekeninghouer beloop.

Van dié lening sal sowat R38 miljoen in die nuwe jaar opgeneem word. Die res van die kapitaalbegroting sal gefinansier word met 'n munisipale lening van R50 miljoen, die opbrengs uit grondtransaksies in die huidige boekjaar wat R15 miljoen beloop, die verwagte opbrengs van die Kleinmond (R8,7 miljoen) en beskikbare kontant van R8,5 miljoen.

'n Verder R6 miljoen is beskikbaar gestel


vir wykspesifieke projekte wat van sowel 'n kapitale as operasionele aard kan wees, solank dit in ooreenstemming met die Geïntegreerde Ontwikkelingsplan is. Elke wyk kry R600 000 vir sy behoeftes.

Wyksgebaseerde beplanning is 'n vorm van beplanning wat ontwerp is om gemeenskapsbetrokkenheid te bevorder en gemeenskappe aanmoedig om verantwoordelikheid vir hulself te neem. Terselfdertyd word die munisipaliteit ondersteun in die naspreking van sy langtermynvisie, naamlik om 'n sentrum van uitnemendheid vir sy gemeenskappe te wees.

Deur die wykskomitee onder leierskap van die wyksraadslid word die mees kritieke ontwikkelingsbehoefte in elke wyk geïdentifiseer. Dit kan onder meer die volgende insluit: ablusiebehoefte in informele nedersettings, straatbeligting, speelplektoerusting, die teer van strate, spoedkalmring en stormwaterkanale.

Raak betrokke by u wykskomitee as u meen daar is behoeftes wat deur die munisipaliteit gehanteer moet word.

Wat die ekstern befondsde projekte betref, moet die toekenning van die Wes-Kaapse regering vir behuising spesifieke melding kry. Dié toekenning beloop in totaal R31 miljoen, maar slegs R9 miljoen word op die kapitaalbegroting weerspieël. Die oorblywende gedeelte is 'n regstreekse bedryfsuitgawe wat hoofsaaklik vir die oprig van topstrukture aangewend word.



OPSOMMING VAN 2010/11 KAPITAALBEGROTINGSPOSTE PER DIENS/RFS KLASSIFIKASIE

Finansies & Administrasie	18 754 588
Beplanning & Ontwikkeling	9 500 000
Sport & Rekreasie	636 778
Behuising	10 828 500
Paaie & Strate	15 050 000
Elektrisiteit	33 125 000
Water	30 012 000
Riolering	20 060 000
Stormwater	5 906 587
Afvalbestuur	2 000 000
TOTAAL	145 873 452

TOP 10 PROJEKTE

Die 10 grootste kapitaalprojekte vir 2010/11 is:

Opgradering van Hermanus se rioolwerke	R19,8 m
Opgradering van Preekstoelwatersuiweringswerke	R17,9 m
Hermanus-verligtingspad	R11,7 m
Kleinmond-behuisingsprojek	R10,8 m
Plaaslike ekonomiese projekte (woonbuurtopgradering)	R9,5 m
Kleinmond-hawe (grootmaatdienste)	R8,7 m
Hermanus se industriële substasie (uitbreiding)	R4 m
Kleinmond-behuisingsprojek: Elektrifisering	R3,6 m
Hangklip se waternetwerk	R3,5 m
Aankoop van voertuie	R3,5 m

OPSOMMING VAN 2010/11 KAPITAALBEGROTING PER DIENS EN BEFONDSINGSBRON

DIENS	EIE BRONNE (MUNISIPALITEIT)	HULPTOEKENNINGS (AD HOC)	TOTAAL
Informasie & Kommunikasie Tegnologie	2 546 238	0	2 546 238
Eiendomsdienste	9 150 000	0	9 150 000
Sport & Ontspanning	0	636 778	636 778
Behuising	3 000 000	7 828 500	10 828 500
Plaaslike Ekonomiese Ontwikkeling	1 000 000	8 500 000	9 500 000
Paaie en Strate	14 250 000	800 000	15 050 000
Elektrisiteit	29 486 000	3 639 000	33 125 000
Water	28 870 000	1 142 000	30 012 000
Riolering	20 060 000	0	20 060 000
Stormwater	2 500 000	3 406 587	5 906 587
Afvalbestuur	2 000 000	0	2 000 000
Voertuie	3 490 000	0	3 490 000
Kleiner Bates	3 518 850	49 500	3 568 350
TOTAAL	119 871 088	26 002 364	145 873 452

OMGEWINGSFAKTORE WAT DIE BEGROTING BEÏNVLOED

Al het die Munisipaliteit Overstrand nie spesiale projekte aangepak met die oog daarop om voordeel uit die Wêreldbekertoernooi te put nie, word daar nog steeds gehoop dat dié gebeurtenis 'n groot hupstoot vir die plaaslike ekonomie sal wees.

Dorpe in Overstrand is binne reikafstand van die gasheerstad Kaapstad, waar agt van die wedstryde gaan plaasvind. Baie sokkertoeriste sal na verwagting hier 'n draai kom maak om walvisse en haai te kom kyk en ook van die uitstekende akkommodasiegeriewe gebruik te maak.

Overstrand het reeds 'n geruime tyd gelede begin om attraksies, soos Markplein en die uitkykpunte in Hermanus, toeristevriendelik te maak en die verblyfprojek is só geskeduleer om so min as moontlik ontwrigting te veroorsaak, het die Burgemeester, mnr Theo Beyleveldt, tydens die tertaaflegging van die begrotingsvoorstelle einde Maart gesê.

Daar is egter 'n aantal sleutelrisikogebiede wat fyn dopgehou moet word, soos onder andere:

- Klimaatverandering, waar afwykings van die normale weerpatrone 'n invloed op water- en kragverbruik kan hê en die inkomstebegroting nadelig kan raak.
- Eskom se verwagte prysverhogings oor die volgende drie jaar kan groei negatief beïnvloed. Inwoners sowel as besighede sal hul kragverbruik deeglik moet bestuur.
- Die terugsky van oortydvergoeding gaan sorgsame bestuur van die direkteure en bestuurders verg.
- Die erge kostestygings van chemikalieë wat vir die suiwering van drinkwater en behandeling van rioolwater gebruik word, word as 'n bedreiging beskou.

WATTER VERHOOGING OM OP JOU MUNISIPALE REKENING TE VERWAG

MANDJIE VAN TARIWE - ENKEL RESIDENSIEEL 2010/11

HOË VERBRUIK		R	%
Eiendomsbelasting	Totale mun. waardasie: R2,5m	39.83	8.39
Riool	R70 + heffing op 70% van waterverbruik	161.45	94.39
Afval	Twee keer per week	15.78	17.13
Elektrisiteit	1500kWh	244.23	25.98
Water	50kl	41.66	8.03
Infrastruktuurheffing		15.04	100.00
BTW		66.94	27.77
REKENING SAL STYG MET		584.39	24.00

MEDIUM VERBRUIK		R	%
Eiendomsbelasting	Totale mun. waardasie: R1,3m	19.54	8.39
Riool	R70 + heffing op 70% van waterverbruik	30.20	17.66
Afval	Twee keer per week	15.78	17.13
Elektrisiteit	800kWh	135.17	24.01
Water	25kl	15.26	8.09
Infrastruktuurheffing		15.04	100.00
BTW		29.60	20.84
REKENING SAL STYG MET		260.59	18.76

LAE VERBRUIK		R	%
Eiendomsbelasting	Totale mun. waardasie: R400 000	5.60	8.39
Riool	R70 + heffing op 70% van waterverbruik	-22.30	-13.04
Afval	Een keer per week	5.70	8.02
Elektrisiteit	350kWh	104.01	22.86
Water	10kl	10.46	8.14
Infrastruktuurheffing		15.04	100.00
BTW		17.22	14.52
REKENING SAL STYG MET		145.81	14.13

SUBEKONOMIESE VERBRUIK		R	%
Eiendomsbelasting	Totale mun. waardasie: R40 000	0.00	0.00
Riool	Heffing op 70% van waterverbruik	8.64	19.70
Afval	Een keer per week	-92.11	-100.00
Elektrisiteit	350kWh	-77.05	-24.06
Water	10kl	-72.64	-73.70
Infrastruktuurheffing		15.04	100.00
BTW		-30.54	-39.32
REKENING SAL STYG MET		-248.66	-39.32

TARIEWE: ONONTWIKKELDE PERSEEL 2010/11

WAARDASIE: GEMIDDELD		R	%
Eiendomsbelasting	Totale mun. waardasie: R250 000	4.70	8.39
Riool	Beskikbaarheid	-35.08	-23.52
Afval	Beskikbaarheid	3.51	8.17
Elektrisiteit	Beskikbaarheid	10.53	8.00
Water	Beskikbaarheid	10.52	14.99
Infrastruktuurheffing		15.04	100.00
BTW		0.63	1.15
REKENING SAL STYG MET		9.85	1.95

TARIEWE: BESIGHEID 2010/11

MEDIUM		R	%
Eiendomsbelasting	Totale mun. waardasie: R3,2m	106.66	10.00
Riool	R70 + heffing op 90% van waterverbruik	296.14	675.19
Afval		4.39	7.94
Elektrisiteit	14 000kWh	2,077.75	25.70
Water	40kl	28.84	7.06
Infrastruktuurheffing		15.04	100.00
BTW		339.10	28.41
REKENING SAL STYG MET		2,867.92	26.41

NIE INGESLUIT NIE: HPP-HEFFING WAT 10% VAN EIENDOMSBELASTING IN DIE TERSAAKLIKE AREA BELOOP

MORELESTANDAARDE-INISIATIEF

RESPEK MAAK 'N GEMEENSAP MOONTLIK

Respek is dié waarde wat dit moontlik maak om met mekaar saam te leef.

Ons het almal gesien wat gebeur in ons land as die waarde van respek nie by almal werk nie. Ons land het 'n verskeidenheid mense, en ons kan nie met mekaar in vrede saamleef as ons nie die waarde van respek hoog hou nie.

Respek beteken dat ek my medelandsburgers respekteer, al verskil ons van standpunt, kultuur, godsdien, sosiale stand of politieke sentiment. Sonder respek beledig ons mekaar, val mekaar aan en

sien die ander as 'n bedreiging vir my bestaan.

Elke mens het die reg om hier te wees, die reg op 'n standpunt, die reg op 'n veilige lewensruimte en die reg om sy of haar potensiaal te bereik. Respek vir mekaar maak juis hierdie moontlikhede oop. Respek gun die ander een wat ek vir myself gun en maak my sensitief vir iets wat die ander kan beledig of aanstoot gee.

Mag ons almal hierdie waarde teenoor ons kinders as voorbeeld utoeleef. Ons is RESPEK aan ons nageslag verskuldig!

Dr Wilhelm Burger

OAK SE PROGRAM

Die konsertprogram wat deur OVERSTRAND ARTS / KUNSTE (OAK) in die Hermanus-ouditorium aangebied word, is soos volg:

Sondag, 2 Mei: Katya Apekisheva, Russiese konsertpianis, wat onder andere Mussorgsky se 'Pictures at an Exhibition' sal speel;
Vrydag, 11 Junie: Chung Wang, pianis, wat werke van Schumann en Chopin sal speel;

Woensdag, 21 Julie: Jeugorkes uit Antwerpen, België;

Vrydag, 6 Augustus: Tygerberg se Kinderkoor.

Let asseblief daarop dat aandkonserte om 19:00 en Sondag-middagkonserte om 15:00 begin. Bespreek deur BELLINI by 028 312 4988 te skakel, en rig gerus enige navrae aan sekretaresse, René du Plooy, by 082 940 4238.